

Bonchi aparte

(na Wilfrido i Tabaré)

na skol nan a siñá mi: bonchi aparte
loke ta di nan ta di nan
loke ta di nos ta di nos
bonchi aparte

pero e simíanan ku Spaña
a tira den tera indján
no a duna un palu pashimá

awa a yobe
i solo a kai na rudia
den tempelnan di Montezuma
i Quetzalcoatl

Bolívar a span un shelo
mas hanchu
ku Venezuela
kontra bonchi aparte
Martí a lora den e bayena
ku ta shorotá nos kurason
demostrando ta kon
por kibra e dam di bonchi aparte

nos islanan a drif bonchi aparte
loke ta di shon ta di shon
loke ta di nos ta di nos
bonchi aparte

piratanan ta warda kosta
pa turistanan por hunga den santo blanko
nos nomber a keda sin señorita
fuma i drogá tirá den kasino
i azeta ta sigui
bai ku nos sodó

i riba kaya bo ta tende bonchi aparte
loke ta di nos ta di nos
despues di nos ta nos
semper-bai-nos
kokolishi tapá
bonchi aparte

pero mi patria
ta un triángulo di tera ku lamá
mi himno yama "Bonarco"
pasobra ami sí konosé e bayena
i mi bandera no ta existí

loke t'ei
ta mi mannan
un chapí
i e sánger
ku Hulanda a buta choria
fo'i Bonarco

HENRY HABIBE